



17. august 2012
9. marts 2012

UKA 2012/89
UPA 2012/89

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Imigassamik aalakoornartulinnik nioqquteqartarnek sassaallertarnerlu pillugit Inatsisartut inatsisaanni nr.11, 11.november 2000-imeersumi §§ 11 aamma 12-imi imigassanik kimittuunik kimikitsunillu nioqquteqarnermi piffissaliussat tuniniaaffiusartut ataasinngornermiit sapaat ilanngullugu nal. 21.00-ip tungaanut sivitsorneqarnissaat siunertaralugu allannguutissatut siunnersuummik Naalakkersuisut saqqummiusseqqullugit peqquneqarnissaannik Inatsisartuni aalajangiiffigisassatut siunnersuut.
(Medlem af Inatsisartut Malik Berthelsen, Siumut)

Tunnngavilersuut:

Qularnanngilaq imigassaq annertuummik atorlugu sunniutigisartagaa inunnut tamanut assigiimmat, tassalu silamik aallartitsisarnera. Matumani assigiinnngissutaasoq tassaaginnarpoq, qanoq annertutigisumik imigassartussanerluta aammalu imigasartortilluta qanoq pissusilersussanerluta immitsinnut qanoq aqussinnaatiginerput.

Ukiut 300-it missaasa matuma siorna nunatsinni imigassaq takornartaajunnaarpoq ukiullu 80-it missaat qaangiupput imigassaq killeqartumik pisiarineqarsinnaalermat. Taamanimiit imigassamut atuinnissamut kakkannerulersimagaluarluta, imigassap kalaallinut inerteqqutaagallarneranili eqqarsartariaasiusimasoq, tassa isumaqartarsimasut inuk putumaleraangami aatsaat angussuannngortartoq, ajoraluartumik ullumikkut sulii ilaatigut taamatut eqqarsartariaaseqarpugut.

Ullumikkut imigassaq putumanartulik nunatsinnut eqqunneqartartoq 1980-ikkunnut sanilliullugu affaannanngupajaarsimagaluarluni, ajornartorsiutit pilersittagai ajoraluartumik imigassap eqqunneqartarneratuulli milliartorsimanatillu ikiliartorsimangillat. Tamannalu kukkusumik imigassartortariaaseqarnermik ilaatigullu imigassap putumaniutaannartut isigineqartarnerannik ilaatigut patsiseqarsoraara. Taamatut imigassamut isiginnittariaaseqarnitsinnut immaqa patsisaasinnaasut ilagisinnaavaat “inerteqqutaarpalaarpallaartumik” imigassamut nammineq inatsiseqarnerput.

Una siunnersuut innuttaasut imernerulernissaannik neriuteqarluni siunnersuutitut isigineqassanngilaq. Soorunami taamatut siunertaqarnangalu neriuteqanngilanga. Siunnersuutaavoq ullumikkut periusiusoq malillugu, inortuilersutut pissuseqarluta ataatsikkuusarsuaq pisiniarrattarnersuatta siammarnernunissaanik aammalu imigassap putumaniutaannartut ilaatigut isigineqartarnerata annikillisarinnisaanut aqqaasinnaasutut isumaqarfigigakku.

Immitsinummi aperisinnaavugut, sooq taamak siusitsigisumik pisiniarfinni matusarnerigut? Sooq arfininngornikkut nalunaaqutaq ataasinnguinnartooq pisiarisinnaajunnaartarpagut? Uffa massa

ajornaquteqanngitsumik imerniartarfinni pisiarisinnaallutigit. Sooq sapaammiluunniit “nerilluarsaatissatsinnilluunniit” viinnisisinnaanngilagut?

Innuttaasut imigassamik atuinissamik ilikkarsimasut amerlinikuugaluartut, takornarissat nalaanni “nuannarisarpakka”, takornarissat Cafe-ini allaniluunniit neriniarfiusinnaasuni ataasinnguamik iggiseqartartut imaluunniit nunani allani timersoreersimatillutik putumaniutigingikkaluarlugu imeruusaatigalugu ataasinnguuartortartut.

Paatsoorneqarumanga erseqqissaatigissavara, soorunami imigassartortannginneq ataasinnguuartortarnermiit torraginerugakku. Kisiannili inersimasut sutussanersut sutussannginnersulluunniit qulaaniit naalackersinnaanngilagut, taamaallaalli ingasaassisumik atuinerup ulorianaataanik paasititsiniaanernik pinaveersaartitsinernillu suliniuteqarsinnaavugut.

Inatsimmi § 11-mi aamma § 12-imi imigassanik kimittuunik kimikitsunillu nioqquteqarneq ataasinngornermiit tallimangorneq ilanngullugu nal. 09.00-imiit nal. 18.00-imut, arfininngornikkut nal. 09.00-imiit 13.00-imut pisinnaasoq allassimavoq. Taamatuttaaq sapaassuarni nalliuttunilu, juulliaqqami, ukiutoqqami, Kunngit Pingasut ulluanni kiisalu Kalaallit Inuiattut Ulluanni (ullortunermi) imigassanik kimittuunik nioqquteqarneq inerteqqutaasoq allassimavoq.

Siunnersuutigivara nioqqutigineqarsinnaanerisa ataasinngornermiit sapaat ilanngullugu nal.21.00-ip tungaanut sivitsorneqarnissaat.

Piffissami sivilisunerusumi tuniniagaalernerat pissutigalugu innuttaasut imernerulernerannik kinguneqassanngitsoq naatsorsuutigaara. Pissutigalugu imerusulluinaqqissaaraangatta nalunaaqutaq imaluunniit qanorluunniit akeqarnera apeqqutaatinneg ajoripput ilisimareeratsigu.

Allaffissornikkut kinguneqaatit:

Siunnersuut allaffissornikkut annertunerusumik sunniuteqassanngilaq, sulisooreersummi atorlugit inatsimmut allannguutissatut siunnersuut suliarineqassammat.

Aningaaqarnikkut kinguneqaatit:

Qulaani akissutigisakka innersuussutigaaqka, tassungalu ilanngullugu siunnersuut imigassanik aalakoornartulinnik tunineqartunik malunnaatilimmik amerlisitsinaviannngitsoq ilimagaara, taamaammallu aningaasatigut kinguneqaateqarnissaa ilimanaateqarnani.

Inuiaqatigiinnut inuussutissarsiutitigullu kinguneqaatit:

Qulaani pineqartunut arlaanulluunniit ajornerusumik kinguneqassanngitsoq naatsorsuutigaara. Pissutigalugu kikkulluunniit putumanartulimmik imigassarsiniartut piserusutsillutik pisiniartuaannarput, matumani apeqqutaanani nal.13.00 imaluunniit 18.00 matussanersut. Ammasarfiisa sivitsornerisigut kinguneriinnassavaa, ingammik tallimangornikkut arfininngornikkullu pisiniat ullumikkutut ataatsikkorsuaq angumersiniullutik pisiniarrattarnerisa piffissamut takinerusumut siaarneqarnissaat.

Naatsorsuutigingilara imerniartarfiutilinnut annerusumik sunniuteqarnissaa. Pissutigalugu imerniartarfiartarpugut inunnik allanik takorusulluta qitikkiartorlutaaluunniit. Aamma nalinginnaanngilaq imerniartarfiit ammarniartartullu imerniartarfiikaasarneq, nalinginnaaneruvoq matunissaanut nal. 1-2-inngoraangata nikittarnerput.